

**Kultureqarnermut, Ilanniartitaanermut, Ilisimatusarnermut Ilageeqarnermullu
Ataatsimiititaliap**

**Ilanniarnertuunngorniartarneq pillugu Inatsisartut inatsisaata allanngortinnersa pillugu
Inatsisartut inatsisaattut siunnersuut nr. xx,xx xx 2015-imeersoq
(Atorfinititsinermut soraarsitsinermullu pisinnaatitsinerit)**

Ilanniartitaanermut, Kultureqarnermut, Ilisimatusarnermut Ilageeqarnermullu Naalakkersuisoq

Pillugu

ISUMALIUTISSISSIONAA

Siunnersuutip aappasaanneerneqarnerani tunniunneqartoq

Kultureqarnermut Ilanniartitaanermut Ilisimatusarnermut Ilageeqarnermullu Ataatsimiititaliap
suliaqarnermini makkuninnga inuttaqarpoq:

Inatsisartunut ilaasortaq Vivian Motzfeldt, Siumut, Siulittaasoq

Inatsisartunut ilaasortaq Peter Olsen, Inuit Ataqatigiit, Siulitaasup tullia

Inatsisartunut ilaasortaq Suka K. Frederiksen, Siumut

Inatsisartunut ilaasortaq Poul Hansen, Demokraatit

Inatsisartunut ilaasortaq Mimi Karlsen, Inuit Ataqatigiit

UKA2015-mi ulloq 20. oktober 2015 siunnersuutip siullermeerneqarnerata kingorna
siunnersuut Kultureqarnermut Ilanniartitaanermut Ilisimatusarnermut Ilageeqarnermullu
ataatsimiititaliamit misissorneqarpoq.

Siunnersuutip imarisaa siunertaalu

Naalakkersuisut Inatsisissatut siunnersuutaanni siunertaavoq atorfinititsisarnermut
soraarsitsisarnermullu oqartussaaffik nunatsinni ilanniarnertuunngorniarfinni
rektorinut/lektorinut tamakkiisumik tunniunneqarnissaat. Ilanniarnertuunngorniarfiit pillugit
Inatsisartut inatsisaanni nr. 13. 22. november 2011-meersumi (ilanniarnertuunngorniarfiit
pillugit inatsit) § 62, imm. 4. oqaaseqatigii siulliap allanngortinneqarneratigut tamatuma
pinissaa kissaatigineqarpoq. Inatsit pineqartoq taama iluseqartillugu Naalakkersuisut
atorfinititsisarnermut soraarsitsisarnermullu oqartussaaffik tigummivaat, tamatumani rektorit
Naalakkersuisut rektorimit sussassaqartumit inassuteqaammik pissarsiniartarlutik.
Taamaalluni atorfinititsisarnermut oqartussaaffiup qitiusumiikkunaartinneqarnissaan
pineqarpoq.

Siunnersuutip inatsisartuni siullermeerneqarnera

Siunnersuutip siullermeerneqarnerani inatsisisstatut siunnersuutip ilinniarnertuunngorniarfinnut ataasiakkaanut aningaasatigut kingunerisassai arlallit eqqartorneqarput. Tamatuma saniatigut tjenestemandinik toqqaasarneq pillugu tjenestemandit pillugit inatsimmi § 4-mut tamanna akerliunersoq nassuaateqaaqqullugu Naalakkersuisut qinnuigineqarput. Naalakkersuisut siunnersummi ajornartorsiutaasinaasunik misissueqqissaarinissaq neriorsuutigaat.

Aningaasatigut kingunerisassat qularutigineqarnerat kiisalu tjenestemandit pillugit inatsimmut naapertuutsitsinissaq pissutigalugit siunnersuut aappassaanneerneqartinnagu Kultureqarnermut Ilinniartitaanermut Ilisimatusarnermut Ilageeqarnermullu Ataatsimiitaliamut suliassanngortinneqarpoq.

Tusarniaarnermut akissutit

Tusarniaanermut akissutit inatsisisstatut siunnersummut ilanngunneqarput, tamannalu Inatsisartut Siulittaasoqarfia ilusiliinermut piumasaqaataanut naapertuuppoq.

Siunnersuut makkununnga tusarniutigineqarsimavoq: Siulittaasup Naalakkersuisoqarfianut, Peqqinnissaqarnermut Naalakkersuisoqarfik, Aningaasaqarnermut Naalakkersuisoqarfik, Inuuussutissarsiornermut, suliffissaqartitsiniarnermit, Niuernermullu Naalakkersuisoqarfik, Ilaqtariinnermut Peqqissutsimut Isumaginninnermullu Naalakkersuisoqarfik, Aalisarnermut Piniarnermut Nunalerinermullu Naalakkersuisoqarfik, Ineqarnermut Sanaartornermut attaveqarnermullu Naalakkersuisoqarfik, Pinngortitamut Avatangiisinut Inatsiseqarnermullu Naalakkersuisoqarfik, KANUKOKA, Danmarkimi ilinniartitaanermut ministeriaqarfik, Avalak, ILI ILI, KIK, Meeqqat Oqaaseqartartuat, NUSUKA, SIK, IMAK, ASG, AK, Aasianni, Sisimiuni Nuummi Qaqortumilu Ilinniarnertuunngorniarfiit, Saviminilerinermut ilinniarfik INUILI, Imarsiornermut Ilinniarfik, NI-Nuuk, Center for Sundhed, Ilisimatusarfik, SPS, Oqaatsinik Pikkorissarfik, Upernaviarsummi misileraaffik savaateqarnermullu ilinniarfik, Aalisarnermut Piniarnermullu Ilinniarfik, Eqqumiitsuliornermut Ilinniarfik, Knud Rasmussenip Højskolia kiisalu inuit pisinnaatitaaffii pillugit Instituti

Tasarniaaffigineqartunitit qulingiluat uku akissuteqarsimapput, taamaattorli oqaaseqaatitaqanngitsunik: Aningaasaqarnermut Naalakkersuisoqarfik, Ineqarnermut Sanaartornermut attaveqarnermullu Naalakkersuisoqarfik, Ilisimatusarfik, Campus Kujalleq, Akademikernes Sammenslutning i Grønland, KANUKOKA aamma inuit pisinnaatitaaffii pillugit instituti.

Tusarniaaffigisat marluk uku akissuteqaamminni siunnersummut oqaaseqaateqarsimapput: Sulisitsisut aamma Meeqqat Oqaaseqartartuat.

Apeqqutit

Ataatsimiititaliap siunnersummik suliaqarnermini atugassatut siunnersuutip matuma aammalu tjenestemandit pillugit inatsisip akornanni pissutsit kiisalu siunnersuutip aningaasatigut kingunissarisai pillugit apeqqutinut arlalinnut akissuteqaqqullugu Kultureqarnermut Ilinniartitaanermut Ilisimatusarnermut Ilageeqarnermullu Naalakkersuisoq ataatsimiititaliap qinnuigisimavaa. Apeqqutit aamma Naalakkersuisunut ilaasortap akissutaata assilineqarnerat isumaliutissiisummut matumunnga **ilanngussaq 1-tut ilanngunneqarput.**

Siunnersummik ataatsimiititaliap suliaqarnera

Inatsisisatit siunnersuutip malittarisassanut ullumikkut atutereersunut inatsisinngortitsinerunera annertuumik oqaasertalersorneqartoq ataatsimiititaliamit maluginiarneqarpoq. Naalakkersuisut siunissami annertunerusumik tunngavilersuuteqartaqqullugit kiisalu inatsisisatut siunnersuummi ilaatinneqartut inatsisitigut inissisimanerannut sunniutit kiisalu suliassaqarfimmi pineqartumi piginnaatitsissutit inatsisisatut siunnersuummi taaneqartut erseqqissaatigeqquillugit Naalakkersuisut ataatsimiititaliamit kaammattorneqarput. Tamanna inatsisisatut siunnersummut periutsinut atuuttunut maleruagassiornissamut taamaallaat atuumassuteqartumut aamma atuutsinneqartariaqarpoq, tassami inatsisiortutut inissisimasut aammalu inuiaqatigiit siammasissumik inissisimasut suleriaatsinut ataasiakkaanut annertuumik paasisimasaqarnissaat naatsorsuutigineqarsinnaanngimmat, paarlattuanilli Inatsisartut Inatsisaannik, nalunaarutinik, il.il tunngavissaqartussatut isigineqartussaammata. tamanna inatsisisami inatsimmut atuutereersumut erseqqissaanerinnartut atuussinnaasariaqarpoq.

Inatsisisatut siunnersuummi matumani ilinniarnertuunngorniarfiit pillugit inatsisip allanngorneqarneratigut nunatsinni ilinniarnertuunngorniarfinni ilinniartitsisunik sulisunillu allanik atorfinitssisarnermi soraarsitsisarnermilu oqartussaaffik qitiusumiikkunnaartinneqassasoq ataatsimiititaliap paasivaa. Tamanna ima paasillugu ataasiakkaanik atorfinitssisarnermut akisussaaffik rektorip kisimiilluinnarluni aalajangersimalluinnartumillu taamaalliluni tigummagu, oqartussaasunut allami inissisimasunut il.il. tusarniaasarnissamik piumasaqaat apeqqutaatinnagu.

Piffiup atorfiginiffiqassap, suliffeqarnermi kulturi, suliffeqarfimmi pisariaqartitat assigisaasalu ilisimasaqarfiginissaat siunnersuutikkut qitiusunngortinneqartut ataatsimiititaliaq isumaqarpoq. Tamanna ataatsimiititaliamit aallaaviatigut taperserneqarpoq, tassami rektorip tamakkuninnga annertunerpaamik ilisimasaqarnissaa ilimagineqartariaqarmat.

Rektorimut piginnaatitsieq tamanna Suliniutit MIO-mit siunnersuutigineqartut atuutsinneqalersinnaanerannut killilersuutaasussanik imaqanngitsoq Naalakkersuisut paasinninnerattut ataatsimiititaliamit paasinneqarpoq. Taamaalliluni MIO-mit

siunnersuutigineqarpoq atorfinitisitsisarnermi ilinniarnertuunngorniarfinni ilinniartut peqataatinneqartarnissaat. MIO-mit kaammattuutaata atuutsinnejalernissaani inatsisinut isumaqatigiissutinullu atuuttunut sinaakkutissat iluini sumiiffimmi aalajangersimasumillu naliliinerup tunngavissaatinneqarnissaanik Naalakkersuisut oqaaseqaataat ataatsimiititaliamit tapersorsorneqarpoq.

Inatsisisatut siunnersuut maanna ilusimisut iluseqartoq akuerineqassappat kingunerisinhaasaanik akissuteqarfingeqarnissaq siunertaralugu ataatsimiititaliap allakkatigut apeqqutit arlallit aqqutigalugit qularutigineqarsinnaasumik paasiniagaqarsimavoq.

Siunnersuutip matuma siullermeerneqarnera tunngavigalugu ataatsimiititaliamit pissusissamisoortutut isigineqarpoq Naalakkersuisut akissuteqaataat nr. 3 tjenestemandinut tunngassuteqartoq erseqqissassallugu. Tassani nassuiarneqarpoq siunnersuut manna tjenestemandit pillugit inatsimmut atuuttumut assortuuttumik inissisimassanngitsoq.

Naalakkersuisut akissut nr. 3-mi ilanggullugu Inatsisartut Siulittaasoqarfiata kaajallaasitaanut 16. Januar 2015 atuutsinnejalersumut innersuussippu. Taamaalillugu Naalakkersuisut akissut nr. 3-mi imatut erseqqissaassuteqarput.:

"Siulittaasup Naalakkersuisoqarfia oqartussaaasut sulisorisanut allaffissornikkut akisussaaffii pillugit kaajallaasitaq 16 januar 2015-imeersoq aqqutigalugu maligassanik aalajangersaanikuuvooq. Kaajallaasitami pineqarput naalakkersuisoqarfiit, pisortaqarfiit aqutsisoqarfiillu tamarmik kiisalu taakku immikkoortortaqarfiit tamarmik.

Kaajallaasitami § 1, imm. 1-imi aamma 2-mi aalajangersarneqarsimavoq qitiusumik allattoqarfimmi oqartussat ataasiakkaat nammineerlutik akisussaaffigigaat piginnaatitaaffigalugulu oqartussaaffiup iluani sulisorisanut allaffissornikkut aalajangigassat, oqartussaaffiillu ataasiakkaat akisussaaffii piginnaatitaaffiilu ilaatigut makkuusut sulisuinik atorfinitisineq, qaffasinnerusumik atorfinitisineq, pissusissanik malinnilluartitsinissamut kinguneqartitsineq soraarsitsinerlu.

Tamatuma saniatigut kaajallaasitami § 1, imm. 3-mi aalajangersarneqarpoq qanoq annertutigisumik oqartussaaffiup ataani suliffeqarfimmuit imaluunniit suliffeqarfinnut arlalinnut sulisorisanut allaffissornikkut akisussaatisinerit piginnaatitsinerillu oqartussaaffiit ataasiakkaat aalajangiisinhaasut."

Lex superior-mi suleriaaseq tunngavigalugu ataatsimiitaliamit eqqaasitsissutigineqassaaq pisortat ataasiakkaat sulisoqarniarnermi ingerlatsineq pillugu akisussaaffii piginnaatitaaffiilu 1. januar 2016, ilinniarnertuunngorniarfiit pillugu inatsisip atuutilerfia tikitsinnagu ilinniarnertuunngorniarfinni ataasiakkaani atuutilisanngimmata. Taamaattoqassappat inatsisissatut siunnersuutip matuma akuerineqarnissaasoorunami pisariaqarpoq.

Siunnersuutip matuma akuersissutigineqarnissaata atuutilersinneqarnissaatalu tungaanut Naalakkersuisut ilinniarnertuunngorniarfinni rektorit innersuussinerat tunngavigalugu Naalakkersuisut ilinniarnertuunngorniarfinni ilinniartitsisunik sulisunilu allanik suli atorfinititsisartuussapput.

Siunnersuutip aningaasatigut kingunerisassai

Siunnersuutip piviusunngortinnejarnernani aningaasatigut kingunerisassai, siunnersummit nalinginnaasumik nassuiaatini allaaserineqarput. Tassani oqaatigineqarpoq siunnersuut maannakkutut isikkoqartilluni aningaasatigut kingunissaqartussaanngitsutut nalilerneqartoq.

Ilinniarnertuunngorniarfiit ataasiakkaat siunnersummi matumani matussuseneqanngissorinartunik aningaasartuuteqartinneqannginnissaat immikkoortumik matuminnga ataatsimiitaliap suliarinninnermini pingaartilluinnarsimavaa. Atorfinititsinermut soraarsitsinermullu atatillugu aningaasartuutaasussat qitisusuunngitsunut, tassa imaappoq ilinniarnertuunngorniarfinnut maanna inissinneqarsimanersut ataatsimiitaliamit paasisallugu pissusissamisoortutut ataatsimiitaliamit isigineqarpoq. Ataatsimiitaliap allakkatigut apeqqutaanut Naalakkersuisut akissutitut allappaat, inatsisit maannakkut atuuttut naapertorlugit aningaasartuutit taakku qitiussuunngitsumut inisisimasut. Taamaalillugu Naalakkersuisut aallaqqaasiullugu aningaasatigut kingunerisassanik naliliinerat ilalerneqarpoq, tamannalu ataatsimiitaliamit pitsaasutut isigineqarluni.

Ataatsimiitaliap innersuussutaa

Siunnersuutip **akuersissutigineqarnissaat** **ataatsimiititaliamit** **isumaqatigiittumit**
inassutigineqarpoq.

Taamatut oqaaseqarluni isumaliutissiissummilu allanneqarsimasutut paasinnilluni
ataatsimiitaliap siunnersuut appassaanniigassanngortippaa.

Vivian Motzfeldt,
Siulittaasoq

Peter Olsen,
Siulittaasup tullia

Suka K. Frederiksen

Poul Hansen

Mimi Karlsen